

Kaadsist saab Tondi hobune

Seeni õks tuu Kaadsi viina jei,
suurõh liinah lel'kot lei,
tälle sai õks sis mano sada miist,
tougas' mano tuhat sõnna:
9715 "Provvakõnõ õks sul vette viirdõ,
läts sisse silla päält!
S'oo sai õks et, Kaadsi, sino peräst,
kukko sisse kur'a peräst -
mille pessit õks sa Taadsi mõtsa veereh,
9720 kolgõt kunnu kaalal?
Ale lasõ-s õks sul otsane tappa^q,
lasõ-s kogone kolke^q!"
Sis läts õks jo Kaadsi kohtlatsõst,
Tuum häpü tundmahe.
9725 Sis nakas' õks tä kodo minemähe,
silla viirde veerümähe,
sis tahtsõ õks vil kaia^q umma Taadsi,
nätä^q puhast provvakõist.
Sis tull' õks jo tuhtõ kottallõ,
9730 sai mõtsa saarõ mano,
koh õks tä pess' pikkä naist,
nuhel' timmä suuril nuil.
Kuri tull' õks sis miiss kuusistikust,
pokan suurõ palo päält,
9735 viina- olli õks täl -pots'ka puusa pääl,
ollõpang ola pääl.
Ütel' õks sis tälle suur sõbõr,
toet' Toomõ-tä-herräle:
"Sul ka õks no om süä haigõ,
9740 paha pardsi meekekene:
jäide õks sa ilma umast naasest,
armõdo abikaasast!
Sul om õks no hallõ umma naist,
puhut süänd üle provva -
9745 no võta^q õks sa sõira, suur sõbõr,
süäme kostuist, kull'a vell'o!"
Kaadsi õks sis ütel': "Tuu^q, ma kae,
anna^q, sõbõr, umma sõira!"
Vaadist nakas' õks sis viina valamahe,
9750 pütüpnüst punn'mahe.
Seeni õks tuu punnõ pokan poiss,
kisk' viina tapu-kikas,
sõbõr õks tälle sõiratõlli,
truuk toppõ turilahe:
9755 "Seeni õks mi joomõ sedä viina,
liidä suuhtõ leemekeist -
varste toosõ õks meil papa parebat,
vana ese ilosappa!"
Papa tull' õks jal pangiga mano,
9760 tur'õ mano tuubrega.
Esi õks tä lausi meelestani,
uma meele poolõstani:
"Ma tõi õks küll mano magusappa,
Kaadsi meele meelütüist!"

9765 Tuu õks küll oll' tuu Tunt',
viguritsep vilets miiss,
kiä ragi õks naid raudsaapit,
mütt' tallo mürgütsit.
Esi õks tä naard' hill'okõtsi,
9770 toet' sõnna tä truugalõ,
(kõnõl' õks tä Kaadsi kuuldmalda,
hellä hinge tiidmäldä):
"Küll lätsi^q õks mul hikkõ hiiro^q ruuna^q,
musta^q olli^q õks mul ruuna^q murrõlitse^q,
9775 pääle kaki õks ma ravvadsõ^q saapa^q,
mürgütalla^q tahvatsõlli
sedä õks paare laotõh,
neid hinge hiileh!"
Esi kallut' õks kõõ Kaadsiõ viina,
9780 toppõ toobiga tälle.
Esi õks tä man kargõlli,
tikõ miiss tirtatõlli:
"Juu^q õks sa, Kaadsi, lüü^q laulo,
olõ^q vessel, virkur' miiss!
9785 Jälke sullõ õks mi naida noorõ naase,
osta töösõ ubasuu,
jälke sullõ õks mi võta Riiä rikka,
Riiä rikka, Tarto targa,
kel om õks taa kulda kotitäu,
9790 hõbõhõt hõlmatäu!
Ma sullõ õks vil anna umast suust,
velelatsõ veerätelle,
sis su^qka õks mi oi umatsõst,
kallu hõimust kallest!"
9795 Kaadsi tiiä-s õks Tundist tunnistõlla,
tiiä-s üldä^q tigõhõst.
Seeni õks sis jei suur joodik,
tundsõ viina Toomõ poig,
kulla õks kooni maalõ kumahto,
9800 murdo musta mulla pääle.
Kaadsi õks sis kummalõ kumahto,
suu õks täl pitsõ pindre pääle -
sinnä õks sis kuule kuri Kaadsi,
vali naasevaivaja.
9805 Tunt' õks sis naard' tugõvahe,
patu ese indsitelli,
kivi^q õks sis üleest kiirdüvä^q,
kannu^q suust kakkuva^q.
Tunt' õks ütel' tuu sõna,
9810 patu ese ilotõlli:
"Ma joudsõ õks ar pettä^q, joudsõ kittä^q,
hiile s'oo hingedese -
meele sai õks no minejä hopõn,
tundõlõ tukõv ruun!"
9815 Kiä õks naa^q viina koolõsõ^q,
linnu lõpõs liikvallõ,
tundõlõ õks nuu^q saava^q hobõsist,
patulõ padi ruunast.